

Visoki predstavnik ponovo poziva na sporazum o Statutu grada Mostara

Visoki predstanik Paddy Ashdown u petak je jasno izjavio da se, bez obzira što Komisija koja je zadužena za izradu Statuta grada Mostara nije uspjela postići sporazum o radnom nacrtu, mora naći stalno rješenje kojim će se štititi i unapređivati interesi svih građana Mostara. Budući da će se sljedeće godine održati općinski izbori, rješenje se mora naći do kraja 2003. godine.

“Izabrani predstavnici grada Mostara prvi put su imali priliku da stvore jedan moderan evropski sistem uprave za svoje građane”, rekao je visoki predstavnik, komentirajući neuspjeh Komisije u iznalaženju rješenja. “Neuspjehom Komisije Evropi se upućuje negativan signal o BiH. Evropske zemlje žele da se uvjere da su izabrani predstavnici BiH sposobni za rješavanje sopstvenih problema”.

Komisija za grad Mostar je jučer kasno pokušala da održi posljednji sastanak, međutim nije se uspjelo osigurati kvorum. Pet preostalih članova od prvobitnih devet, koji su predstavljali sve konstitutivne narode u BiH i sve vodeće stranke zasupljene u Gradskom vijeću, izradilo je nezvaničan dokument koji sadrži neka od raznih mišljenja koja su bila zastupljena u Komisiji, koja je inače imala zadatak da sačini jedinstven nacrt Statuta do 31. jula 2003. godine. Ovaj dokument odražava jasno i generalno mišljenje da je status quo u gradu Mostaru neodrživ.

“Sve strane u Mostaru dale su podršku ovom procesu; upućivale su predstavnike i davale prijedloge. Mnogi članovi Komisije su pojedinačno dali značajan doprinos u radu Komisije, međutim iznevjereni su opstrukcijama stranačkih mašinerija. Iako

Komisija kao cjelina nije postigla uspjeh, ona je ipak osigurala osnovu na kojoj se može graditi dalje", rekao je visoki predstavnik.

Visoki predstavnik zahvaljuje onim članovima Komisije koji su radili predano u Komisiji i time osigurali da ona ipak zabilježi pomake u radu.

"Iskoristit ćemo period godišnjih odmora da sagledamo situaciju i utvrdimo kao ćemo dalje", rekao je visoki predstavnik. "Činjenica da se naredne godine održavaju općinski izbori znači da će pitanje Statuta grada Mostara morati biti riješeno do kraja ove godine. Ja dijelim nestrpljenje građana Mostara koji žele da se ovo pitanje riješi i da grad i usluge za koje plaćaju porez postanu normalnije".